

Tiranë, më 21.04.2025

KALLËZIM

NGA: Qendra “Qëndresa Qytetare”, një organizatë jofitimprurëse e regjistruar me Vendimin Nr. 1120, datë 15.09.2016, të Gjykatës së Rrethit Gjyqësor Tiranë, me seli në adresën: Rruga “Ali Pashë Gucia”, Pallati nr. 42 me adresë elektronike qendresaqytetare@gmail.com, me Drejtor Ekzekutiv Z. Rigels Xhemollari, përfaqësuar me autorizim nga **Z. Dhimitër Zguro**.

KUNDËR:

1. Znj. Zegjine Çausi,
2. Drejtorit të shkollës 9-vjeçare vartëse “Rramen Dashi”, Arapaj,
3. Partisë Socialiste të Shqipërisë,
4. Dhe çdo personi tjetër, të pa identifikuar deri më tani nga ana jonë, por që me veprime konkrete rezulton se ka përgjegjësi administrative.

OBJEKTI:

1. Konstatimin e përdorimit të burimeve publike.
2. Marrjen e sanksioneve administrative bazuar në dispozitat ligjore ndaj të gjithë personave të kallëzuar, si dhe atyre që do të identifikohen gjatë hetimit administrativ.

DREJTUAR: **Z. Ilirjan CELIBASHI**
Komisioneri Shtetëror i Zgjedhjeve
Komisioni Qendror i Zgjedhjeve

BAZA LIGJORE: Nenet 91, 171 dhe 172, të ligjit nr. 10019, datë 29.12.2008 “Kodi Zgjedhor i Republikës së Shqipërisë”.

I nderuar Z. Komisioner,

Pasi jemi njohur me veprimet e mëposhtme, paraqesim para Komisionerit Shtetëror të Zgjedhjeve, këtë kallëzim kundër Znj. Zegjine Çausi dhe Drejtorit të shkollës 9-vjeçare vartëse “Rramen Dashi”, Arapaj, për shpërdorimin e burimeve publike, si dhe kundër Partisë Socialiste të Shqipërisë, në cilësinë e partisë politike, që përfiton nga kjo veprimtari e ndaluar, si dhe çdo personi tjetër, që gjatë hetimit administrativ do të rezultojë se ka përgjegjësi, për arsyet si më poshtë vijon:

I. RRETHANAT E ÇËSHTJES

1. Më datë 18.04.2024, Znj. Zegjine Çausi ka publikuar në rrjetin social “Facebook” fotografi të shkrepura gjatë një takimi elektorale.¹ Në këto fotografi vërehen materialet propagandistike të Partisë Socialiste dhe kandidatës për deputete Zegjine Çausi [**Prova nr. 1 – Fotografi të materialeve propagandistike**]. Sikundër vërehet, takimi elektorale është zhvilluar në ambientet e shkollës 9-vjeçare varëse “Rramen Dashi”, Arapaj [**Prova nr. 2 – Fotografi të postuara nga Zegjine Çausi ku identifikohet vendi i takimit**]. Nga fotografitë e publikuara rezulton se ambienti i jashtëm i shkollës është i rrethuar, ndërsa dyert e brendshme të shkollës janë po ashtu të hapura [**Shih Prova nr. 2**]. Nga pamjet e gjeneruara nëpërmjet “Google Maps” konstatohet se, ambienti i shkollës është me mur rrethues [**Prova nr. 3 – Pamje e gjeneruar nëpërmjet “Google Maps”**].

II. E DREJTA E APLIKUESHME

2. Ligji nr. 10019, datë 29.12.2008 “Kodi Zgjedhor i Republikës së Shqipërisë”;
- (i) **Neni 91 “Ndalimi i përdorimit të burimeve publike në mbështetje të subjekteve zgjedhore”** parashikon: *“1. Me përjashtim të rasteve të parashikuara me ligj, nuk mund të përdoren ose të vihen në mbështetje të kandidatëve, të partive politike ose të koalicioneve në zgjedhje burime të organeve apo enteve publike në nivel qendror ose vendor, apo çdo lloj enti tjetër ku shteti zotëron kapitale apo kuota ose/dhe emëron shumicën e organit mbikëqyrës apo organit administrues të entit, pavarësisht nga burimi i kapitalit ose pronësia. 2. Në kuptim të këtij neni, “burime” quhen asetet e luajtshme dhe të paluajtshme, të parashikuara në nenin 142 të Kodit Civil, si dhe çdo burim njerëzor i institucionit.”*
3. Vendimi i Komisionit Rregullator nr. 9, datë 24.12.2020 “Për rregullat e raportimit të veprimtarive me karakter publik të çdo institucioni publik, e me kapital shtetëror, agjencive, enteve shtetërore, kategoritë e veprimtarive të ndaluara, si dhe monitorimin e veprimtarisë, sjelljes dhe përdorimit të burimeve njerëzore, financiare dhe logjistike të administratës shtetërore para zgjedhjeve”;
- (i) **Neni 3 “Veprimtari të ndaluara”** parashikon: *“1. Në zbatim të këtij vendimi: 1.3 “veprimtari të ndaluara”, janë edhe ato veprimtari që përfshijnë: c) vënien në dispozicion të aseteve të luajtshme dhe të paluajtshme të parashikuara në nenin 142, të ligjit nr. 7850, datë 29.7.1994 “Për Kodin Civil të Republikës së Shqipërisë”, të ndryshuar, për qëllime zgjedhore, që janë në pronësi apo administrim të organeve apo enteve publike në nivel qendror ose të njësisive të vetëqeverisjes vendore, apo çdolloj enti tjetër ku*

1

<https://www.facebook.com/zegjine.caushi/posts/pfbid02z8Ycxv1rSyjvsSttcS25BmWdwkvudF447m2Bsya7qctrLvrjLwWgP4BbvbmPFrHwl>

shteti zotëron kapital/kuota/aksione ose/dhe emëron shumicën e organit mbikëqyrës apo organit administrues të entit”.

III. ANALIZA LIGJORE

4. Nga interpretimi sistematik i dispozitave të Kodit Zgjedhor me ato të vendimit nr. 9, të Komisionit Rregullator, që të ndodhemi përballë një shkeljeje administrative që lidhet me (keq)përdorimin e burimeve shtetërore, duhet që të plotësohen disa kushte në mënyrë kumulative. Së pari, duhet që veprimtaria të jetë kryer nga një prej subjekteve të ngarkuar me detyrime nga ligji dhe aktet nënligjore. Së dyti, duhet që veprimtaria të përfshijë vënien në dispozicion të aseteve të luajtshme dhe të paluajtshme të parashikuara në nenin 142, të Kodit Civil, që janë në pronësi apo administrim të organeve apo enteve publike. Dhe së treti, duhet që vënia në dispozicion e aseteve publike të jetë bërë për qëllime zgjedhore.

5. *Përsa i takon kushtit të lidhur me subjektet*, ligjvënësi në pikën 1, të nenit 91, të Kodit Zgjedhor bën një përcaktim të përgjithshëm duke sanksionuar se me përjashtim të rasteve të parashikuara me ligj, burimet publike nuk mund të përdoren ose të vihen në mbështetje të kandidatëve, të partive politike ose të koalicioneve në zgjedhje. Në rastin konkret, në dispozicion të fushatës elektorale të Partisë Socialiste është vendosur ambienti i shkollës 9 – vjeçare të ndodhur në fshatin Arapaj. Ky fakt, provohet nga fotografitë bashkëlidhur këtij kallëzimi.

6. *Përsa i takon kushtit të dytë të lidhur me vënien në dispozicion të burimeve publike*, duhet që burimet të jenë asete të luajtshme ose të paluajtshme në pronësi të organeve publike qendrore ose të njësive të vetëqeverisjes vendore. Siç rezulton edhe nga rrethanat e çështjes, në rastin konkret, edhe ky kusht provohet përsa kohë që ambienti i vendosur në dispozicion është i një institucioni arsimor parauniversitar publik.

7. *Përsa i takon kushtit të tretë që lidhet me qëllimin e vënies në dispozicion të aseteve publike*, referuar pikës 2, të vendimit nr. 9/2020, të Komisionit Rregullator, për efekt të ngarkimit me përgjegjësi administrative duhet që vënia në dispozicion e aseteve shtetërore e publike të jetë bërë për qëllime zgjedhore. Në rastin konkret, është e qartë që vënia në dispozicion e aseteve shtetërore është bërë për qëllime zgjedhore sepse lidhet me propagandën e Partisë Socialiste. Ky fakt përforcohet si nga përmbajtja e regjistrimit të publikuar, por edhe nga përmbajtja e postimit me të cilin ky regjistrim është publikuar. Po ashtu, për aq kohë sa nga përdorimi i burimeve publike është kryer në favor të një partie politike, edhe kjo e fundit duhet të mbahet përgjegjëse për shkelje të ndalimeve të Kodit Zgjedhor.


IV. KONKLUZIONE

8. Përsa më lart, mbështetur në nenin pikën 1 dhe 2, të nenit 91, në pikën 1, të nenit 171 dhe në pikën 1, të nenit 172, të Kodit Zgjedhor të Republikës së Shqipërisë; pikën 1 dhe 2, të nenit 3 dhe pikën 1, të nenit 10, të Vendimit të Komisionit Rregullator nr. 9/2020, përfundimisht,

KËRKOJMË:

1. Konstatimin e përdorimit të burimeve publike.
2. Marrjen e sanksioneve administrative bazuar në dispozitat ligjore ndaj të gjithë personave të kallëzuar, si dhe atyre që do të identifikohen gjatë hetimit administrativ.

Për “QËNDRESA QYTETARE”



Dhimitër ZGURO

Bashkëlidhur, ju lutem, mund të gjeni provat:

- Prova nr. 1 – Fotografi të materialeve propagandistike;
- Prova nr. 2 – Fotografi të postuara nga Zegjine Çausi ku identifikohet vendi i takimit;
- Prova nr. 3 – Pamje e gjeneruar nëpërmjet “Google Maps”.